

Akuunerulersitsinissaq pillugu Naalackersuisut nalunaarusiamik saqqummiussinissamut Inatsisartunit suliakkerneqarnissaannik aalajangiinissamut siunnersuut. Nalunaarusiami ersersinneqassaaq inatsisartut oqaatsit pillugit inatsisaanni § 5, imm. 1 naapertorlugu kalaallisut oqaatsinik ilinniarnissamut pisinnaatitaaffik qanoq sunniuteqarnersoq, sunniutaalu naammaginartutut isigineqarsinnaanersoq. Taamaanngippat sunniutaasup amigaataanerani naammaginanninneraniluunniit aporfiit suunersut paasissutissiissutigineqarnissaat kissaatigineqarpoq. Nalunaarusiami oqaatsinik ilinniarnissamut pisinnaatitaaffiup inatsimmi § 5, imm. 2 tunngavigalugu nalunaarusiuunneqarnissaa tamatumalu qanoq pinissaa inassutigineqassaaq. Peqatigitillugulu nunatsinni inuiaqatigiinnut, kulturimut, ileqqunut, peqatigeeriaatsinut naleqartitanullu tunngatillugu assigisaanik malittarisassaqartoqarnissaanik pisariaqartitsisoqarnersoq nalunaarusiami naliliisoqassaaq.

(Inatsisartunut ilaasortaq Juliane Henningsen, Inuit Ataqtigiit)

Akissuteqaat

(Ilinniartitaanermut, Kultureqarnermut, Iisimatusarnermut Ilageeqarnermullu Naalackersuisunut ilaasortaq)

Aappassaaneerpeqarnera

Aallarniutigalugu Kultureqarnermut, Ilinniartitaanermut, Iisimatusarnermut Ilageeqarnermullu Ataatsimiititaliaq qutsavigissavara, Naalackersuisut akuunerulersitsinissaq pillugu nassuiaammik saqqummiussaqaarnissaat pillugu Inatsisartut aalajangiiffigisassaattut siunnersuut peqqissaartumik suliarineqarsimammat. Ataatsimiititaliap isumaliutissiissummini akuunerulersitsinissaq pillugu isumaliutersuutitik nassuiaateqarfigisimavai, suliassaqaarfittut immikkoortutut akuunerulersitsinissaq isigalugu, tamatumunngalu tapiliullugu allannguutissatut siunnersuutinik saqqummiussisimalluni.

Naalackersuisut aalajangiiffigisassatut siunnersuutip siullermeerneqarnerani maluginiarpaat oqallinneq annertunerusutigut akuunerulersitsiniarluni suliniuteqartoqatariaqarnersoq pillugu isummersornerusoq, oqaatitsigut akuunerulersitsiniarneq pingaanertut sammineqarani.

Ataatsimiititaliap isumaliutissiissutaani ersippoq ataatsimiititaliaq aalajangiiffigisassatut siunnersuummik sammisaqarnermini siunnersuuteqartumik ataatsimeeqateqarsimasoq, tassanilu inerniliunneqarsimasoq siunnersuutip pingaarnertut siunertarigaa nunatta akuunerulersitsiniarnermi qanoq eqeersimaartumik ingerlatsisinnaanera.

Kiisalu isumaliutissiissummi allanneqarpoq ataatsimiititaliap pissusissamisoortutut isigigaa akuunerulersitsiniarnermi siammasissumik suliniutinik ingerlatsisoqassasoq, aammalu

ataatsimiititaliap isumaliutersuutigisimagaa akuunerulersitsiniarneq pillugu nassuiaasiassaq sunik imaqassanersoq.

Naalakkersuisut ataatsimiititaliap akuunerulersitsinissaq pillugu suliniuteqartoqarnissaanut Naalakkersuisut aaqiissuusaanerani susassaqarfimmi sorlermi inissisimanissaanut isumaliutersuutaannut qujapput. Nalornisoqaqqunagu erseqqissaatigissavara Naalakkersuisut Siulittaasuata akisussaaffigimmagu aalajangissallugu akisussaaffiit sorliit Naalakkersuisut aaqiissuussaanikkut sumi inissisimassanersut, tamanna Inatsisartut Naalakkersuisullu pillugit Inatsisartut inatsisaanni § 23-mi soorlu nassuiarneqartoq.

Naalakkersuisut ataatsimiititaliap inerniliinera isumaqatigaat, taamatullu oqaaseqarlunga Naalakkersuisut sinnerlugit inassutigissavara ataatsimiititaliap isumaqatigiittup inassuteqaata Inatsisartut akuersissutigissagaat.